


BATALLA DEL GUADALETE

POEMA EN BABLE ASTURIANO

POR

Pepín Quevedo.



Ast.E.R.
C.17-30

LUARCA

IMP. MOVIDA Á VAPOR DE RAMIRO P. DEL RÍO

R.R.651

A.R. XVII


30

D. 286456

BATALLA DEL GUADALETE







PAL ENTAMO

I

Fay muchos tiempos ya, pero entovia
Respíguense los pelos al pensalo,
Y respíguense más ¡mialma la mia!
Si se tercia que póngome á cuntalo;
Pos miro á España yo como á una fia,
Y siempre q' algo i asocede malo,
Na más que con qu' ei toquen en un pelo,
Ya me teneis poniendo 'l gritu 'n cielo.

II

Dame Espíritu y Santo el tu talento,
Dame l' anritación que necesito
Pa cuntar con idea aquesti cuento,
Y atestiguar al mundo que m' enrito.
Ya non pido de bienes el aumento,
Po la herba y maiz dáseme un pito;
El fin que llevo ye más soberano:
Plasmar, atochecer al hombre humano.

III

Taba 'l pais d' España, diz un cura,
(un flaire jesuita, gran cabeza)
Desfrutando de paz y de fartura,
Viciosu y consumio de pereza.
Tengu d' esto la fecha bien segura
Conforme á un libro vieyu que la reza:
Fay mil años y ciento ochenta y cinco,
Que mirando al presente ye güen blinco.

IV

Todu Dios á triuntar y á emborracharse,
Y á divertise de cien mil maneres,
Sin estinción de seso nin de clase.
Mecies á los homes les mujeres:
Hasta (yé vergonzoso de cuntase
Mas de toes maneres aguaderes)
Entamó el mesmo Rey por dar ejemplo,
Que, miániques, ye grande com' un templo.

V

Llamábase Rodrigo, guapo mozo,
Acopladin y pinto de la rama;
Mal apenes i entama á salir bozo,
Más nidia la cutís q' una madama;
Amigu de folgancia y de retozo
Y más que de la guerra, de la cama:
Tal yera 'l Rey d' España ó de los Godos,
Pos decíase entós d' entrambos modos.

— 5 —

VI

Vive nel su palacio de Toleo
Asistío de Condes y marqueses,
Lo más del tiempo en música y recreo,
Y sin parase miga n' intereses.
Tien ley tomada á un Conde muncho' feo,
Y súbei la soldada to los meses:
Ye que tien una fia munchu guapa,
Y anda viendo Rodrigo si l' atrapa.

VII

Yera Siñora munchu aseñorada,
De precipios, carauter y fegura;
Boquina pa besar y gran papada;
No i llega á tres polgades la centura.
Tien el arca del pechu llevantada;
Agüele á herba seca y á frescura,
Y nin miga á eses coses de los frascos
Que són engaña-bobos pa dar chascos.

VIII

Llamábase Florinda; poques gracies
Si yera como flor d' Alejandría.
Por ella nos vinieron les disgracias...
— ¡Siendo tanta la gracia que tenia! —
Pos per uquiera que la vista espacies
Home del mundo, ves igual profia
Y son de mancomun los pareceres:
Que todo 'l mal mus vien po les mujeres.



IX

Y asocedió qu' el diablo, siempre atento
Pa tener e nes almes señorío,
Apuntói á Florinda el pensamiento
De dir bañase po la tarde al río;
Y diz q' un capellan jué al Rey col cuento,
Y, co la misma, el Rey, munchu encendio,
Fuxó pa un michinal del su palacio,
Y púnxose á atisbar muy por despacio.

X

Entoncia les mujeres pa bañase
Non andaben com' hoy en tonteries,
Y pa más bien el cuerpo remoyase
Y refrescar d' afecho les veries,
Lo primero de todo era quedase
Del moño á los calcaños desvesties,
Y, á todu más, con cinta colorada,
Facer é nel piscuezo una llazada.

XI

Lo qu' el Rey vió desde la su garita
Non lo contaré yo, que soy decente;
Siempre que dá un calón la señorita,
Ponse Rodrigo muncho impertiniente;
Al resurtir del agua s' espepita,
Y queda muý picao y desprudente,
¡Y eso que no habia entós rayos católicos
Que la barriga ven... y hasta los cólicos!

XII

El caso ye qu' el Rey, en sin derecho,
Diz qu' ensiguida i traigan la rapaza
En sin más, y ello dicho y elle fecho;
Sobresaliente el Rey, vela y l' abraza.
El corazón reblincai e nel pecho,
Siente el hombre qu' ei falta la cachaza;
Manda espejar l' habitación á todos,
Y queda con Florinda y en sin godos.

XIII

Pónse la moza muy patagüeyera,
Y faise de rogar un pèdacico;
Apúrrei el galan una pulsera;
Y dispués un manifico azarico.
Asi y todo Florinda tá roncera,
Escuende la faición col abanico,
Y, por si acaso, todu va guardándolo,
Peru lo prencipal sigue atapándolo.

XIV

¿Veis cuando 'l gallo ronda la gallina,
Y fai aquel arrullo con el ala,
Del piscuezo les plumes empovina
Buscando l' acomodo pa lograla,
Fasta que, cuando ménos s' adivina,
Si non ye po la güena, po la mala,
Güelta pa aqui, güelta pa alli, cansóse,
Da un blinco, y fay la suya y acabose?

XV

Guardando á les presones el respeuto
Que piden la doctrina y la crianza,
Hubo ente Rey y súdita l' efeuto
Que se pinta n' aquella comparanza.
Muncho lloró Florinda l' esprefeuto
Sin pensar del refran e na enseñanza:
«Jui pa cá del vecin y avergoncéme,
Golvi pa la mió casa y remedieme».

XVI

Foy Florinda pa casa, y en un creo
Pide papel rayao, y nel escribe
Al padre, que tá juera de Toleo;
Diz la mala conduta con que vive,
Q' hasta i dá cortedá dir al paseo,
Con cien veyures más al respetive;
Y digo al ver q' así se desazona;
¿Quién te mandó ser blanda, mosconzona?

XVII

El Padre de Florinda que se llama
Don Julian, enfurezse com' un toro:
Tirase ato contino de la cama
Onde tá costipao; rindese al lloro,
Y diz que, pos que ya perdió la fama,
Tien que perdela más diendo pal moro...
¡Cuándo jué de razón la traidoria
Anque á uno i estrocen una fia...?

XVIII

Lo qu' el Conde debió facer, y pudo,
Jué plantáse en Toleo en dos pasiades,
Buscay el bulto al Rey, comelo crudo,
O pegay venticinco mormiellades.
Con' este tal facer morrocotudo,
Pasaria com' home de corades,
Y si diba á un presidio, pa la xente
Seria 'l home más rial y más decente.

XIX

Peru 'l Conde ¡traidor! non fai asina,
Sinon qu' iguá en dos blincos la maleta,
Y con rumbo hacia 'l llao de la marina,
Con' un par de criaos, toma soleta.
Jura y prejura q' ha trayer la ruina
Pal pais aunqu' el diablo s' entrometa;
Llega á punta de Calpe, ve una lancha,
Y déxase correr po la mar ancha.

XX

¿Veis cuando d' una cima muncho alta
Cai un peñón en de por sí redondo,
Roda que rodarás, salta que salta
Con blinco cada vez ménos serondo,
Y ya 'l declive del terren i falta,
Y ruémpese con' impetu nel fondo?
Asina foy del Conde la concencia:
Cayó, rodó con lloca endependencia.

XXI

¿Y non visteis tamien cuand' una fola
Va quebrase muy dulce ente l' arena,
Recula p' hacia tras, non güelve sola,
Q' otra mayor l' amburria y la solmena,
Y asina va creciéndoi la su cola,
Fuxe la otava y güelve la novena
Co la furia qu' ei da tantu escremento?
Quien tenga refleisión q' apliqu' el cuento.

XXII

Asina qu' el mal Conde tierra apaña,
Curre que curre pol pais del moro
Va pedricando guerra escontra España,
Diciendo el Potosí q' hay aquí d' ióro;
Y dáse el condenao tan bona maña,
Que la morisma toda fai coro,
Y un tal Murcia, contento de los planos
Queda en venir con tropa á conquistanos.

XXIII

A todo esto na Corte de Rodrigo
Non hay nin dos menutos d' asosiego,
Y páme que de Dios vien ya 'l castigo
Por ser el Rey tan grande mujeriego,
Wermulfo por un llao faise el amigo,
Y así propio desmiéntese muy lluego,
Y Don Oppes, metiendo la cizaña,
Ha trer tamien la perdición pa 'Spaña.

XXIV

Don Oppes, Arzobispo toledano,
Tien muchu corporienta la presona,
Ye rancoyu, na barba tien un grano,
Y muy poco marcada la corona.
Les pitances no i caben e na mano,
La vida que se fay ye muncho bona...
Siempre tuve por cosa bien segura
Que no hay carrera como la de Cura.

XXV

Agua con esponjao tienla de sobra,
Con chocolates mata la carpanta,
Y el pan rustrío fái bona obra;
El repollo que come non lo llanta.
Si dalguno se muere canta y cobra,
Si daquien se bautiza cobra y canta;
Y non yeren muy males albiricies
Aquellu de los diezmos y premicies.

XXVI

Mas golviendo á Don Oppes, yera 'l caso
Que muchu se cartiaba co nel Conde,
Pos antes que metese n' un mal paso
Quier saber cómo y cuándo y hasta ónde;
Escríbei Don Julian en sin retraso,
Y otra güelta Don Oppes i arresponde;
Y asina cartes van y cartes vienen
Pintando la intención qu' entrambos tienen.



XXVII

Algo barrunta 'l Rey del temporal,
Y consulta á un xudío, un tal Ruben,
Que y' un libro de misa n' abertal
Y sabe chá les cartes muncho bien.
El mago pinta 'l sino muncho mal
Co los vicios qu' el pueblo godo tien,
Y por un as d' espadas que sacó
A 'spaña y al su Rey desanunció.

XXVIII

No i fái güen cuayo lo qu' ei diz l' hebreo,
Y mandai que consulte co la lluna;
Obedez, tira linies, y e n' un creo
Güelva á pintai muy negra la fortuna.
El probe Rodriguin tembla de mieo,
Y por si 'l mago tien ó non tien zuna,
Arrimai una mano de morrades
Y su media docena de llambiades.

XXIX

N' esto la Caba (la mujer del Cabo
ó la mala mujer nel habla mora)
Anque sana y correcha com' un ñayo,
Non fay llabor y tá llora que llora.
Diz que se i punxo na cabeza un clavo,
Que del Rey ye la culpa á ultima hora,
Y que l' *aición aquella* non jué válida...
Pos amiga, non jueras tú tan cálida.

XXX

Entremedies el cielo ponse oscuro
Y qual qu' asocedió cuando l' eclise;
Delgún sér animal anda seguro;
Tembla 'l suelo amagando' que va abrise.
A fuerza de rezar y d' esconxuro
Y meniar el lisopo y compunxise.
Allá 'l Siñor Dios Todo Poderoso
Golvió á trer pa l' aspaña un tiempo hermoso.

XXXI

Yera n' Abril del año sietecientos
Once, al tenor que cunten los cristianos
(Esto tá contenido en documentos
Que m' emprestó Pepín Quevedo Llanos).
Jué el casu que los moros muy famientos
Tocanen n' Algecires pa tantianos,
(Algecires en moro ye Isla Verde,
Pos quiero explicar bien cuanto m' acuerde).

XXXII

Vieno un propio con cartes pa Rodrigo
E na mesma ocasión de tar xintando;
Non se i encueye al Rey el embeligo
Anqu' el casu pa él ye dir tirando.
El propiu que de todú yé testigo
Arrevienta el peligru aponderando,
Y diz el Rey: «¿Total cuatro morucos
Danvos llercia?» Sois unos rapazucos.

XXXIII

—Non son cuatro, Siñor, son cuatrocientos,
Son milenta, son más, no hay quien los cunte,
Y sobre que son tantos, son gafientos
Y yé razón que mala la barrunte.—
Entós Rodrigo pa acortay los vientos
Foy derecho pal propio transiunte,
Y de dos mormiellades l' oscompuxo,
Yqual que hizo con Rubén el bruxo.

XXXIV

Non yera la intención de la morisma
Cautivar el pais n' aquel istante,
Si non ver el paisaje y la marisma,
Dexando lo demás pa más alante.
Arroben á fartar y co la misma,
Y con' un botiquin muncho abundante,
Pañen los bergantines poderosos
Y enfilen pa Marruecos soberbiosos.

XXXV

Hubo gran sestaferia de moritos
Y asistieron soldaos y generales,
Aponderando muchu los malditos
A 'spaña y los sus frutos naturales.
Tienen muestra de todos los destritos
Entamando pol vino y Olivares
Y acabando pol trigo y la cebada,
Po l' almendra y el figo y la granada.

XXXVI

Forma 'l Conde ¡ladrón! de los primeros,
Y pa dayus más ales entovia,
Pintayus muncho bien los limoneros
Naranjales, verdura y cuanto cria
Dios na vega y el monte y escampleros,
Collada, foz, cordal, cañada, eria,
Y hasta el seó sin vergüenza echa sus fallos
Sobre les nuestros moces y caballos.

XXXVII

Igual que d' elles probes de mujeres
Cuando ven que los homes ya non piquen
Cámbiense de segundes á terceres
Y al son d' espectral, mus enzarriuen,
Apoderando de cien mil maneres
A otros moces q' al arte se dediquen,
Asina el Conde fay: perdio por uno
Diz él, perdio ya por ciento y uno.

XXXVIII

Tantu dió Don Julian la parpayuela,
Q' al sarracen i pruye pasa 'l charco,
Y todú Dios tá allí que se les pela,
Y n' un decir Joasús faise l' embarco.
Non puede inflar el vientu tanta vela,
Non hay sitio na mar pa tantu barco;
Pero 'l mar n' osperdicia ni una gota,
Y asina fái el moro la derrota.



XXXIX

Tocanón nel peñón de Gribaltar
Q' hoy en dia tá 'n manos del Inglés,
Y que yé vergonzoso de nombrar
Desde 'l mesmo peñón hasta Avilés.
(Peru esta cuestión tien que s' arreglar
Si non yé 'l mes que vien el otru mes.
Cuando den un respiru á esti pais
La tocata de Cádiz y el malbis).

XL

Blinea pa tierra 'l moro, y al istante
Amonta nos caballos corredores;
Y como formiguero con turbante
Ó llangosta de miles de colores,
El terren por u vá dexa rasante,
Verdures, hortalices, fruta, flores,
Sotripando á los homes como fieres
Y llevandu consigo á les mujeres.

XLI

El que manda más d' ellos ye Tarif,
Tan forzudo que yé barbaridá,
Pos diciendo que tay col sable *pif*
Parte al chaval más doble por metá,
Non creo q' haiga hoy en todo 'l Rift
Moro de más respeuto y calidá;
Juera d' esto ye guapo com' un sol,
Y más q' a mosulman tira á 'spañol.

XLII

Tien á la postre el Rey conocimiento
De lo que va xugao al Mediudia,
Y manda por editos nel momento
Marchar pa 'scontra 'l moro al otro dia;
De toes les campanes lleva 'l viento
Los sones d' arrebato y monteria;
Y igual fayen los cuernos, caracoles
Y píñfanos, qu' el casu tien bemoles.

XLIII

Armasé el Rey de pies á la cabéza
Y entremedies que s' arma echo sus cuentes;
Tamien s' armen el probe y la grandeza
Con' armes que pol mexo tan furmientes.
Hasta s' armen los cures ¡qué rareza....!
Rareza non, que jueron muy decentes:
Siendo como era infiel el enemigo,
Tuvo bien q' ayudasen á Rodrigo.

XLIV

¿Habiá faltar Don Oppes? N' home non;
Allí taba 'l maldito de cocer,
Faciéndose co 'l Rey el combayón
Que paez que la osa quier comer.
El Rey no i adivina la intención,
Pos ye noble anque flaco de calter,
Y asina va Don Oppes al su fin
En sin topar estorbos n' el camin.

XLV

Pa amanecer un dia del domingo
Salen les tropes con Rodrigo al frente;
Paeime que los veo y los estingo:
Unos lleven chaleco resplandiente,
Otru non puede más y lleya un pingo,
Aquél, plumeru muy sobresaliente;
Oppes y el su 'standarte van por parte,
Y mialma no 'stá él mal estandarte.

XLVI

Tantos yeren los moros que non cunto,
Mas, sin querer facer lo negro blanco,
Y buscando un promedio pal asunto,
Llenarin dos conceyos como Lluanco.
Les legües diaries q' anden non apunto,
Pa ellos ye igual monte que barranco,
Y anda que t' andarás de noche y dia,
Tocanon nel confín d' Andalucia.

XLVII

Vien Tarif co la tropa sarracena
Agoliendo la carne de cristiano,
Y cruciando la sierra de Gimena
Pol puerto de Galis, qu' é comarcano,
Abaxa pol Tempul, y ansi á la güena
De Dios (ó del demonio) dá n' un llano,
Mismamente onde 'n río Guadelete
Viert' agues otro río, el Aguaicete.

XLVIII

Rodrigo, co l' escuadra, selencioso,
Mentes que los marruecos descansaben,
Seliquin co la industria del raposo,
Vá pa onde los pláticos cuntaben.
Ponse todo alteriao y malicioso
Al ver unes fogueres q' allumaben;
La fogarata ye la moreria
Qu' espera q' alborezca el nuevo dia.

L' AICIÓN

1

Yera 'n Julio, el ventinueve,
Hay neblina de verda;
Entre si orbaya ó si llueve,
Y dengún bandu s' atreve
A meniaše d' onde tá.

2

La gurriana jué fuxendo,
El dia foise clariando;
El agua sigue caendo
Asi como atapeciendo,
Mas cedo jué abocanando

3

Columbra 'l moru al cristiano,
El cristiano al musulman;
No hay un claro 'n todu 'l llano,
Y tan dándose la mano
De tan cerquina que tan;

4

Tan aprosimaos qu' el río,
Hay entremedies non más,
Río guapo, fondo y frío
Que cuerre con señorío
Sin importai lo demás.

5

Dame gran cavilación
Cuand' una disgracia aporta,
El vér cóm' una purción
De coses van al su son,
Y nin miga yus emporta.

6

Un suponer: muerre un fío;
Y el duelu que mus trespassa
Non i da calor nin frío
A alguién, q' aveces y' un río
Ó un carru cargao que pasa.

7

Y dayure trái consuelo
El carru que non jué socio
Llorando 'l mi desconsuelo,
Pos digo: el rapaz va 'l cielo
Y el carru va 'l su negocio.

8

Y toy pensatible al fin,
Y guélvome á atristayar
Co 'l carru, y digu pa min:
Carru, por esti camin
Ya non güelves á pasar.

9

A todu esto el sarracen
Y el godu tanse mirando;
Peru denguno ye quién
Pa 'rmai al etro un belen;
Mas q' anden caracóliando,

10

Y viendo quien cuerre más
A todu soltar de brides.
Diendu pa lantre y pa tras,
Y en sin pensar en jamás
Nel riesgu de les sus vides.

11

El godo que tá cansao
De facer tanto camin,
Atópase encaniao,
Y anda pel suelo tirao
Manducand' un bucadin.

12

Com' un rapaz cicateru.
Que faise con otro 'l bú,
Y cadún d' ellos roncero
Anden co 'l «picame tú»
—«Non, picame tú primero»,

13

Pos tán muy aparecios
El godo y el mosulman;
Mirense muy ofendiós
Con caniles retorcios
En sin decir flin nin flan.

14

...¿Peru q' hay nel campu moro?
¿Qué y' aquella tremulina,
Y aquel run run y acaloro?
Ye Tarif, que fech' un toro,
A lós suyos fala asina:

XLIX

«Hast' aqui juenon flores la campaña;
De qui pa riba hay que pulsiar, moritos:
Por delante teneis toda la 'spaña;
Non valen los sus homes nin tres pitos.
Naide piense del barcu na compaña,
Pos ya mandé quemalos por editos,
Non hay tu tia, pa salir avante
Hay que llevalo todu por delante».

L

Faise Rodrigo 'l cargu de la plática,
Y desd' el carru de marfil y dioro
Púnxose á cimentar la mesma tática
Enritandu á la tropa escontra 'l moro;
Sinon que, como sabe más gramática,
Y ye rey pa falar con más decoro,
A toes les palabras dá güen curso
Y así salí manífico el descurso.

LI

Y diz: «Nobleza que me tás mirando,
Culto y Clero, homes ricos, rexidores,
Pueblo que te consumes trabayando
Y pases mil afuegos y sudores,
Allí mus tán los moros escucando
Pa del pais facese los siñores,
Y hay que murir primero q' asoceda
Si ye que más remedio non mus queda.

LII

Como cad' ún estimo yo la vida,
Pero en sin la vergüenza non val nada,
¿Non veis aquella tropa tan guarnida?
Pos non ha quedar d' ella nin tayada.
Paéme que ya 'ntama la batida;
Non tembles, godo, ten mucha corada:
D' un costao tá la Meca con Mahoma,
D' otru tá Dios nel Cielu, el Papa 'n Roma.»



LIII

Mal apenes el Rey ansi dixera,
Cuandu ya 'l belberisco taba 'nriba,
Motivao q' alcontrara una pasera
Que d' un costao del rio al otro diba.
Los glaios que dá son de manera
Q' atronen la comarca respetiva;
Gasten estribu corto, espetu llargo
Pa que vaigais faciéndovos el cargo.

LIV

El godo, anqu' estropiao po les mujeres,
Con remos ablayaos po la folganza,
Viendu que ya la cosa va de véres,
Como 'n medio de todu tien crianza,
Espurre ato contino les banderes
Y con forcau ó palu ó foz avanza;
Ruca los dientes, llama á la Porísima,
¡Y hay la que se va 'rmar, Virgen Santisima!

LV

El moru d' encarnau todu vestio,
De color de zapato el su pelleyo,
Co 'l mirar tan tremendo y encendío
Cual si una lluz tuviés en cada güeyo,
Asorda l' aire con atroz glaio,
Y cuerre más qu' esnala un esperteyo,
Y sobre 'l godu cái po la dizquierda
Cuidando que tá floxa alli la cuerda.

LVI

Dió la probalidá que á aquella mano
Taben Pelayo, fio de Fabilia,
Y Tadmiro, valiente veterano
Q' anque vieyu relluci la popila;
Y jué 'l su resistir tan soberano,
Tan bien supienon apertar la fila,
Que los moros fuxenon todos xuntos
Semando pol camin muchos defuntos.

LVII

Mándai Tarif á un tal Malé q' apierte,
Y dái una gran juerza de escuadrones;
Témbleni les corades á la Muerte,
Encuéyense los grandes corazones.
L' aduación del godo ye tan juerte
Qu' ei suple la floxera de riñones;
Tadmiro á Moraicel dái nel turbante
Y enrodiéllailo todu p' hácia lante.

LVIII

Allí taragañar yera curriente,
Arrabuñar tá bien apareció,
Tirase po los pelos nin se siente,
El calvo po les barbes ye coio,
Como mosques allí muerre la xente,
Delgún bando tá floxo nin galdio;
Non diz blanco nin negro la fortuna
Cuando 'l sol dexa 'l puesto pa la lluna.

LIX

Vien el dia segundo de la griesca,
Un llunes por más señes. El Cristiano
Llevántase del suelo po la fresca
Con corades y aliendo soberano.
Quien pértiga quien gárabu allí piesca,
Lo que cad' ún atopa más á mano,
Y van p' hacia los moros chando fumo
Cuidando non dexayus nin el zumo.

LX

Blinca Tarif nel su caballo, y vola,
Y trái á Abencerraj pa reforzase;
El campu sarracen y' una gran fola
Que paez q' hasta 'l mundo quier tragase.
Peru, amigo, la fola non ye sola
Y otra va' frente d' ella pa 'l contrase,
Y atópense, á la postre, con istruendo
Que pel monte y la llana va cundiendo.

LXI

Allí los de les insules Baliares.
Co les refundies qu' en xugar esmechén,
Y les fleches por miles de miates
Que na carne del moro s' aprovechen;
Allí les invenciones militares
Que pa causar prejuicios s' enderechen,
De todú fay la preba el güen cristiano
Pa batise más bien co 'l africano.

LXII

Como gallos de castra d' habaneros
Agárrense con furia na quintana,
Y dispués de tirase golpes fieros
En sin sentir nin miga de medrana,
Reculen p' hacia tras muncho altaneros
Pa golver á zurrase la badana
Si á mano bien en aquel mesmo dia
En sin plizca d' ablayo na profia;

LXIII

Pos igual fái el godo y la morisma
Un dia, dos, tres, cuatro y hasta siete,
De contino rompiéndose la crisma,
Entrambos acomete q' acomete
Hasta que vien la noche, estrema 'l cisma
Y dengún bandu ya se compromete,
Y güelve pal terren com' una malva
P' asgonciarse al rayar la primer alba.

LXIV

Y allega el dia otavo, dia postrero
D' aquella gran aición... y de l' aspana:
En rebullir el moro ye 'l primero
Faciendo arco con traidora maña
Seliquin, munchu sele, munchu artero
Por si quiciás nel medio mus apaña;
Manera d' agarraše muy moruna
Que los péritos llamen media lluna.

LXV

Perú nada i valió porq' jay amigo!
Ye munchu pillo 'l Rey y camentóse,
Y ansi que se camienta, Don Rodrigo
Del carru d' ioro y de malfir tiróse,
Y ansi que se tiró pa 'l enemigo,
Co 'l total de la xente encaminóse,
Y encaminao que juè, l' aición entama,
De les ocho que van, la de más fama.

LXVI

Va 'l Rey vestio con' un sayo d' ioro,
Debaxo cotaimalla muy brillante,
Espueles avaluades n' un tesoro,
Na cabeza corona de diamante.
En' esta isposición marcha pal moro
Con' una espada muncho rellumbrante:
Amonten al par d' él Tadmir, Ruxero,
Pelayo... en fin, la Biblia por entero.

LXVII

¿Veis dos toros con celo na parada
Embestise cruziando los sus cuernos,
Co la vista nel suelo munchu airada,
Bramando como bramen nos infiernos,
Hasta q' al fin agarra una cornada,
Y salen tripes pa 'llenar tres duernos,
Y con todo y con eso, la quimera
Siguese atroz como si nada juera?

LXVIII

Pos esto non yé más q' afalagase
Comparao co la griesca que vos pinto
Porque ¡cóime! una cosa yé turniase
Por mandamiento propio del estinto,
Y otra muy diferente espanzurrase
Sabiendo que se peca escontra 'l quinto...
Quier decir, que se peca non por cierto
Que bien matao tá siempre el moro muerto.

LXIX

Tantu apertó 'l Rey goðo y la su xente
Qu' el sarracen recula espavorío;
Va tras d' él el cristiano cual sirpiente
Y po les traces llévalo vencio,
Y vá dar co los huesos na corriente
Supuesto q' anda ya próximo el río;
Pero 'l Siñor del cielo y de la Tierra
Quixo dar otro giro á aquella guerra.

LXX

Y el giro foxy que diendo ya 'l cristiano
Apoderando al sarracen d' afecho,
Salienon de la fila, d' una mano
Los fíos de Vitiza; á poco trecho
Sal tamien l' Arzobispo Toledano
Y con' ellos pa 'l moro va derecho,
Y abrazen á Tarif... ¡mala centella
Que non desfizo la traición aquella!



LXXI

Y' un suponer: por una cuerda tiren
D' un llaor cien mozos, cien de la otra punta;
Enduviéllénse, apuxen y s' estiren,
Y cuandu ganancioso ya se cunta
Un de los bandos, vése que cospiren
Trenta mozacos d' él y facen xunta
Y liga con' ol bando perdidoso
Que trócase nel auto en ganancioso.

LXXII

Pos bien, un casu muncho aparecio
Asocedió n' aición que toy contando,
Y los que diben afogase 'n rio,
Del Rey godo y los suyos escapando,
Enflotaos 'n el refuerzo recibio
Aparen de fuxir, güelven bramando,
Mentes que los cristianos cobren Ilercia
Y cad' un cuerre según bien se i tercia.

LXXIII

Y vien Tarif al frente dando voces
Y diciendo ¡Gualáh! qu' en habla mora
Senefica «por Dios»; y ellos, feroces,
L' aspada retorcía trunfadora
Ximielguen n' aire, esgorgolando atroces
Cuantos pañen co'l filo hora tres hora,
Hasta que vien la noche; vien pa todos,
Pero más oportunia pa los godos.

LXXIV

Foy por demás la mortandá de xente,
Y semada quedó la tierra toda
En cuatro legues prosimadamente
Co los cadávres de la linea goda.
Quita 'l xuicio y encueye al más valiente
Tantu cráneo español como alli roda,
Y co la sangre, el rio, una semana
Corrió 'ncarnao lo mesmo que la grana.

LXXV

¿Y á todo esto qué yé del Rey Rodrigo
Que non se sabe d' él? Pos diz la historia
Que pa más bien fuxir del enemigo
Y despintar de sí toda memoria,
Arrinca la corona y el su abrigo,
N' Orelia 'monta, y en sin moratoria,
Pel rio Guadalete introducióse,
Non venció la corriente, y afogóse.

LXXVI

Ysta foy la batalla tan tremenda
Qu' un reino mus costó, mas entovia,
Pos costónos el créito y l' hacienda
¡Todo ello motivao 'na traidoria!
¿Quién dixés que ganamos 'na contienda
Con cuanta castra d' homes el sol cría,
Primero y po la posta con romanos,
Dimpués con Suevos Vándolos y Alianos!

LXXVII

Según el parecer facurtativo,
Duró l' aición tres dies naturales;
Hay quien diz qu' el combate 'tuvo vivo
Cinco dies justitos y cabales;
Daquién que pa sabelo tien motivo
Carcula una semana; les siñales
Que premiten facer mejor promedio
Danyi á l' aición de dura mes y medio.

LXXVIII

Alfonso, el que fixo aquelles siete
Partides con q' á todos asombraba,
Rey y abogao, co lo del Guadalete
Cinco siglos dimpués entá lloraba;
Y en mediu del su lloro s' asomete
A lo que ya por Dios dispuesto taba:
Pueblo de gran arrullo al mujerío
Pos pueblo encaniao, pueblo perdio.

LXXIX

Y tú Florinda, Florinduca, atiende;
Y tú Rodrigo, Rodriguin, espera:
Non vos pienso reñir ¡cómo se entiende!
Sé lo que yé la mocedá primera,
Y la sangre bien sé á lo que propende
En diciendo qu' el fuelgó l' apodera;
Pero el qu' é Rey non puede divertise,
Y, com' hoy dicen, tien que compromise.

LXXX

Y vusotros moritos farfantones,
Los que vais á la Meca 'n romeria,
Y todo vos volveis abuluciones
Y fer monades desque risca 'l dia,
Non andeis enflotaos co les aiciones
Que remanecen de la traidoria,
Porque non faltará quien vos componga:
...¡Pol pronto tais citoas pa Covadonga!

(*Infiesto 1896.*)

ES PROPIEDAD.

Se prohíbe la reproducción.





BIBLIOTECA PÚBLICA

Ast.

A.R.A. XVII

30